

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : YB Tuan Wong Sze Phin @ Jimmy
[Kota Kinabalu]

TARIKH : 10 JUN 2014

SOALAN :

Tuan Wong Sze Phin @ Jimmy [Kota Kinabalu] minta **MENTERI PENDIDIKAN** menyatakan berapakah rakyat Sabah yang menerima basiswa daripada Kementerian dari 2003-2013. Nyatakan kuota basiswa yang akan diberi kepada rakyat Sabah dan jumlah basiswa yang diterima, jenis jurusan dan institusi yang ditempatkan dalam tempoh yang sama.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) menyediakan 19 bentuk penajaan basiswa/bantuan kewangan/pinjaman pelajaran kepada semua rakyat Malaysia yang ingin melanjutkan pelajaran di peringkat sijil sehingga pasca kedoktoran **tanpa mengira kaum atau negeri**. Pemberian basiswa dan bantuan kewangan ini mengambil kira faktor kelayakan serta keadilan bagi semua kumpulan sasaran yang berkelayakan bagi memastikan pembangunan modal insan yang seimbang.

Kerajaan sentiasa memastikan pemberian basiswa dan bantuan kewangan di peringkat pengajian tinggi ini diberikan kepada pelajar yang benar-benar berkelayakan dan memenuhi kriteria ditetapkan seperti merit akademik, ko-kurikulum dan latar belakang sosio-ekonomi keluarga pemohon. Usaha ini menunjukkan bahawa Kerajaan sentiasa berusaha memberikan peluang

pembiayaan untuk mendapatkan akses pengajian tinggi kepada pelajar berkelayakan dari semua lapisan masyarakat.

Berdasarkan rekod KPM, seramai 5,318 orang pelajar dari negeri Sabah yang mendapat tajaan dan biasiswa sehingga Mei 2014. Dari jumlah tersebut, seramai 2,770 orang pelajar dalam jurusan bidang sains dan teknologi dan 2,548 orang pelajar dalam jurusan sains sosial.

Bagi tempoh 2009 hingga 2013, seramai 637 pelajar dan guru rakyat Sabah telah menerima biasiswa berjumlah RM39,836,699 untuk mengikuti pengajian dalam bidang pendidikan di peringkat ijazah pertama, sarjana, dan kedoktoran di universiti awam dan swasta, di dalam dan luar negara. Secara puratanya, pelajar-pelajar yang menerima biasiswa KPM akan dibiayai yuran pengajian, elaun sara hidup, elaun buku, elaun perkakas, elaun tesis, elaun penempatan, dan elaun-elaun lain yang berkelayakan.

Manakala di peringkat persekolahan, Kerajaan telah menyediakan Biasiswa Kecil Persekutuan (BKP) untuk pelajar Tingkatan 1 hingga Tingkatan 5 dan Biasiswa Kelas Persediaan Universiti (BKPU) untuk pelajar Tingkatan 6 yang cemerlang dalam akademik dan juga kokurikulum dengan syarat pendapatan ibu bapa tidak melebihi RM1500 sebulan. Biasiswa ini diagihkan dengan mengambil kira jumlah keseluruhan enrolmen murid bagi setiap negeri. Jumlah peruntukan BKP dan BKPU yang diperuntukkan kepada murid-murid di negeri Sabah adalah seperti berikut:

Jenis Biasiswa	2012		2013	
	RM	BIL MURID	RM	BIL MURID
BKP	15,850,000	18,869	15,805,030	18,816
BKPU	1,874,723	1,833	1,539,640	1,501